

Giuventetgna Rumantscha, Chasta postala 312, 7002 cuira, GiuRu: www.giuru.ch

VUSCHS
giuvna



Scuntrada da represchentants da la GiuRu cun giuventetgna internaziunala.

MAD

Emprender da tschels, NOW!

■ 30 giuvenils che derivan da 9 pajais differents han visità durant l'avust per diesch dis la Svizra ed er il Grischun u pli exact il Passugg. La finimira dals organisaturs NOW era da pussibilitar ina tala experientscha a giuvenils che n'han normalmain betg avunda daners avant maun per viagià e n'era betg access a barats internaziunals. Quai camp en il Grischun è stà l'emprim eveniment dal project da NOW, l'organisa-ziun che ha sia sedia en Svizra. Il project va sis mais e durant quel temp dat i traits

inscuters persunals nua che las participantas ed ils participants han la chaschun da realisar cun agid dals organisaturs lur agens projects. Davos NOW stat tranter blers auters era Annina Schlatter che ha organisà il contact tar ils Rumantschs.

Durant lur temp en Svizra era la gruppa in di a Cuira. Avantmezdi ha ina part da la gruppa visità ensemen cun trais suprastants da la Giuventetgna Rumantscha la Chasa Rumantscha per survegnir in'invista en la realitad rumantscha. Suentermezdi è ina mesadad da la grup-

pa ida a viandar durant che l'autra mesadad ha pudì scuvrir cun la GiuRu la citad veglia da Cuira. Sco ch'ins po vesair sin la fotografia avevan els durant la spasegiada tras Cuira temp da scriver cartulinas per trametter quellas a lur famiglias e lur amis.

Il proxim project da NOW è era gia en planisaziun, interessentas ed interessents dastgan sa chapescha s'annunziar sco voluntaris. Davart il proxim project sco er ulteriuras infurmaziuns chatt'ins sut: www.nowornow.org. *Aline Müller*



@ecatho Plaun dalla Greina #greina #greinahochebene #wanderlust #capannascaletta #swissmountains #alps #flowers #flowerdance #rumantsch.

FOTO E. CATHOMEN

Eau vulesc viver in üna generaziun inua cha persunas as guardan aint ils ögls

■ Savaivast cha in media passaintains quatter ans da nossa vita a guardar giò sül monitor da noss telefonins? Cha üna persuna normela da nossa societad passainta set uras al di vi dal computer? E savai-vast cha 81% da quels chi drouvan smartphones sun ragiundscheibels 24 uras da 24? In mincha cas ho la tecnologia üna granda influenza sül esser uman.

Minchün ho dapü cu 300 amihs, ma nus ans sentims listess sulets. Nus savains tuot las istorgias dad els, ma els nun haun üngün'ideja chi cha nus essans. Tuot nossa tecnologia es be ün'enorma illu-siun. Seguond meu avis ans rechattains tuots in ün muond digitel, inua cha s'oda ed as sainta persunas, ma nu las vezza. Quantas voutas essas entros in ün restaurant e vais vis ün pèrin, chi d'eira occupo cun lur telefonins? Nus pretendains be da nu vzair cu cha nossas vi-

tas dvaintan adüna pü isolesas. Ma che dessi dir? Eau sun svesc culpabla. Eau sun svesc trista, cur cha schmaunch meu telefonin a chesa. Eau sun svesc uras a la lungia a guardar che noviteds cha que ho sün facebook. Ils telefonins sun gnies inventos per amegldrer il contact cun noss amihs. Displaschaivelmaing craj eau dafatta ch'els il dannageschan. La tecnologia ans separa da la gliעד cha nus amains. Invezza dad inscunter amihs in qualche bar per baderler als scrivains svelto ün sms e que d'eira l'unic sforz cha vains fat per quel di. Ma bgers fenomens negativs resultan da quist grand problem. Iffaunts vegnan critichos perque ch'els haun in maun ün I-pad impè da's divertir sülla piazza da giuver. Ma que nun es la cuolpa dals iffaunts u da la tecnologia. Na, que es la cuolpa da nos ambiaint. Bgers genituors haun

(memma) temma da lascher ir our in via lur iffaunt, perche cha lo as zoppa bgers prievls. Uschè, l'unic chi resta es da rester dadains a giuver cul telefonin e'l computer. Ma tuctamaing ho la tecnologia üna influenza negativa sün nus umauns, perche ch'ella separa ils indivi-duums da la realted. Eir be cun metter aint uragliers e tadler musica ans dista-chains dal muond reel.

Mieu sömme es cha ün di nu dvainta la gliעד gritta scha la batteria dal telefonin es bassa, ma ch'ella s'inac-cordscha cha lur vita es memma preziusa per passer quatter ans a guardar giò sül telefonin. Scha s'es memma oc-cupo cun guardar sül monitor, nu's vezza las occasiuns chi passan speravi. Eau vulesc viver in üna generaziun inua cha persunas as guardan aint ils ögls.

Miranda Fanconi

Seria da texts – part V

DA FLAVIA HOBI

■ Nossa seria da texts va vinavant e cun plaschair preschentain nus quella giada las contribuziuns da Jennifer, Christina e Miranda che visitan l'Academia Engiadina a Samedan. Sut il titel «Ignorà e listess cuntshaint» menziuna Jennifer «50 Sfumatori di Grigio», Bob Marley e Goethe ed explitga pertge ch'ella pensa che dapli gliעד duess leger la bibla. «Adüna quista giuventüna dad hozindi» – tenor Christina in'expressiun che

mintgina e mintgin haja gia udi. Ella quinta dal giavisch da pudair meglierar il num da la giuventetgna e da lur experientschas. Miranda scriva davart la tecnologia e la gronda influenza en l'esser uman. Ella numna cifras da statisticas interessantas, declera ils fenomens negativs envers quel fatg e pertge ch'ella vulesc «viver in üna generaziun inua cha persunas as guardan aint ils ögls». La GiuRu giavischa bun divertiment cun leger ed engrazia zunt fitg a las auturas per lur contribuziuns!

Ignorà e listess cuntshaint

■ Id es ura e temp, pensa, e tscherch il fögl da lezchas da rumantsch. Davo avair chattà quel legia tras las differentas propostas pels cumponimaintins. Quistas cumainzan adüna culs listess quatter plects: «Sch'eu füss ün cudesch...».

Il prüm cuntinua culs plects «... nu'm plaschessa chi'm legessan be per obligaziun o perche chi füss moda.» Legiond quist am vegnan adimaint cudeschs da scoula cha stuvains leger. Implü pensa vi da las roman-zas talianas tituladas cun «50 Sfumatori di Grigio» (il titel talian tuna pelvaira bler meglter co'l inglais!) chi sun gnüdas vendüdas plü da 100 miu. voutas. In quist connex stossa dar pro ch'eu nu d'eira moderna avuonda per am dar giò culla seguonda sort. Quista sort cudeschs vegnan e van, eu però füss gugent ün cudesch chi resta! Dimena legia la prosma proposta.

«... füssa üna poesia immensa chi dess significaziuns inspettadas als plects.» Eu dod a meis neni a dir sül versin da Calfisch:

«Inua cha'ls tucts paun cumander, ed ils scorts haun da fer, que es tal militier!» Il poet Calfisch definiva ils plects in ün nouv möd! Nus vain a Calfisch, la Jamaica ha a Bob Marley e la Germania ha a seis Goethe. Ma güdan lur plects gronders inavant a nos muond?

Il terz tema tuna uschè: «Sch'eu füss ün cudesch füssa ün'arma fina ed efficazia per eliminar la guerra per saimpermà!» Blera gliעד ha già dat sül la spranza chi detta uschè ün cudesch. Eu persunalmaing sun persvasa chi dà ün tal cudesch già daspö tschientiners. Ün cudesch cha blers laivan eliminar e listess til ha circa minchün in chasa. La bibla. Scha be daplü gliעד as pigliess temp da la leger e dess üna chance a quist vegl cudesch, füssa'l bainbod eir persvas cha la soluziun per tuot ils problems vegn explichada in el.

Sch'eu füss ün cudesch, vulessa be esser il plect da nos bap in tschèl.

Jennifer Scantlebury

Adüna quista giuventüna dad hozindi

■ Her d'heja fat qualchosa propi tuct, eau d'eira approfondida in mieus impissamaints e nu d'he spetto fin cha l'ultim veglin d'eira sortieu dal bus auz cu ch'eu sun ida aint. Per furtüna m'ho quel veglin güsta fatt'attenta sün meu grand sbagl. «Adüna quista giuventüna dad hozindi!» ho'l sbragieu plain rabgia, squassand sieu bastun per ir a spass. Schi, schi. Quista frasa cugnuschains bain avuonda. Chi da nus nu l'ho auncha mè udiu? Precis, üngün. La giuventüna dad hozindi es impertinenta, nu salüda, nun ho respet da la gliעד attempeda... Eau pudess cuntinuer quista glista, ma lura nu gnissi hoz pü a fin.

Mia intenziun dal prossem di d'eira dad amegldrer il nom da la giuventüna dad hozindi. Eau d'he salüdo a propi mincha hom attempo e mincha duonna attempeda. Ma chi ho salüdo inavous? Üngün! Cur ch'eu sun ida aint il bus a Samedan d'heja guardo fich precis, per esser sgüra cha propi tuots sajan sortieus. Arriveda a Schlarigna vu-

laivi sortir dal bus, ma chi blockescha tuot la porta e nun ho spetto fin cha tuots d'eiran sortieus? Precis, ün veglin cun sieu bastun per ir a spass.

Cun chaminer a chesa m'es gnieu incunter ün vegliet e cur ch'eu al d'he salüdo ho'l salüdo inavous riand. «WOOOW», d'heja penso, «que do tuottüna eir auncha da quists!» Quist es la cumprouva cha que do excepziuns tar la giuventüna da pü bod, ma eir tar la giuventüna dad hozindi, chi ruinan il nom da quistas duos generaziuns. Nus nu pudains bütter a tuot ils vegliets illa listessa sadella, la granda part es nempe propi amiaivla. Ma il listess vela eir per nus giuvens, na tuots correspuondan a quella glista.

Chi so, fors sun eir eau üna vouta üna veglina chi's agita da la giuventüna dad hozindi, ma per esser sincera, nun es que bger pü simpel scha las differentas generaziuns sun amiaivlas üna cun l'otra e's respettan?

Christina Müri, 4G 1



«Il lag alpin bials verds, l'aua tarlischa el sulegl, la selva stat a semper en plena vigur ed il crap tegn en perpeten encunter. In rempar tschentau franc sin tiara sut tschiel blau si-su gl'uaul.»

FOTO U. CANDRIAN